

東槎紀略卷一

平定許楊二逆

長沙鄧
振鐸西
請刊

桐城姚

瑩石甫著

臺灣入籍一百四十年姦民十一一起浮動好亂其土性然也生齒日繁所在多遊手非械鬥則爲盜道光三年趙文恪督閩患之慎選守令以福州府方傳穉署臺守一時臺灣道孔昭虔臺灣縣李慎彝鳳山縣杜紹祁嘉義縣王衍慶淡水廳吳性誠噶瑪蘭廳呂志恆皆有聲四年五月鳳山縣打鼓山鳴園竹生花七月逢閏民間以爲昔林爽文反有此兆訛言閒起臺防同知缺杜紹祁代之署鳳山縣者劉功傑也頗銳意捕盜未幾而許尙之事起許尙者鳳山廣安莊人業賣栳榔素結諸無賴羣盜悅之爲鄉保所東槎紀略 卷之一

告懼捕遂與所善蔡雙弼張仔來高烏紫王曾楊良斌沈古老徐紅柑林溪及番人潘老通謀反其黨甚眾期以十月十一日集議先攻下淡水縣丞署次攻埤頭遂及郡城苦無貲先肆劫掠時反謀未露也傳穉聞盜檄縣急捕尙將起其莊人劉黃中微聞其謀畱諸家勸之不使尙出功傑捕尙及良斌不得焚其居跡至黃中家十三日遂以尙獻械繫馳送于郡傳穉親訊之得其反狀言于鎮道曰許尙之黨俱在事破必速亂埤頭無城不可守也劉令初仕其參將又懦宜增兵防且臺地匪民所在嘯聚甚易曩者南路有事則北路起應北路有事則南路騷動郡兵常苦爲所掣今宜及未起速備北路俾我得專力於南鎮道皆然之乃密飭嘉漳淡水爲備時苦積潦郡城嘉義城垣皆

圯急繕治之而使紹祁偕縣丞丁嘉植都司翁朝龍以郡兵二百協守埤頭埤頭者鳳山縣治也舊縣燬于林爽文移治埤頭僅樹竹圍又燬於蔡牽故慮之至則民間已紛言賊起爭避郡城然莫知賊所在營縣日出清莊捕賊十餘人最後得其軍師林溪許尙之被獲也其黨將散楊良斌不可眾乃推良斌爲首聚議黃梨山中良斌製刀杖旗幟使潘老通借礮於其舅番通事潘巴能以林溪爲軍師王曾爲都督領紅旗李川鄭榮春爲正副先鋒領烏旗蔡雙弼以下皆爲頭目分招賊眾期二十四夜攻埤頭戍官據地卽乘勝攻郡城使徐紅柑自臺灣沈古老自嘉義各招其黨並起又使吳賜潛入郡城結匪民內應約既定二十一日林溪至埤頭市五色綢製旗溪故縣中白役偵賊者也陰爲賊主謀官所往賊先知之故其謀甚密溪市得綢使人持往已將飯而後行其母詰知出首故獲之訊未卽服良斌見獲溪不待眾集二十二夜遂以賊數百人分西北兩路攻埤頭殺苦苓門汛兵自竹圍隙處以入埤頭先有備紹祁功傑守縣署朝龍嘉植守倉賊先至倉朝龍揮兵擊之傷斃二賊賊燃大礮不震遂敗走其縣前賊已砍柵門將入亦爲鄉勇擊退參將某聞賊擁兵火藥庫不出翼日語朝龍曰賊雖敗必且大至埤頭倉署皆不可守火藥庫有土垣四面阻水昔蔡牽攻不能破可速據此朝龍惑之遂移兵入文官相率隨人民大惶懼奔逃姦人乘閒搶掠塘報兵又爲賊殺道路遂梗二十三夜郡中聞警乃議昭虔慎彝以城守左營及安平水師兵守郡傳穰與

署臺鎮趙裕福中營遊擊楊俊督師援鳳山許尙猶在府
監斬之而後行時郡中訛言四起人心震駭紳士韓高揚
黃化鯉等入見傳穉請方略傳穉曰鳳山雖一隅距郡城
百里賊朝發可夕至也恐有姦宄應之宜固根本今郡城
垣壞漏夜築之兩日可竣城內外街市多立木柵君等率
丁壯隨李令日夜親巡城上分布兵勇安平副將率水師
六百人駐西城外螻蛄石以衛商行爲犄角城內設勁兵
三百人環甲露宿足爲策應各衙門及紳士家皆募鄉勇
以收遊民無使助賊惟大兵南下賊必潰走當遏之勿使
越入郡境已飭臺灣嘉義營縣分屯兵勇扼其要隘且令
各莊者簡壯丁相爲守援土賊不得往應則吾事濟矣或
請閉郡八門曰不可南路難民避賊者日數千至不能無

納且毋使北路謠傳郡城被困啟姦人心也道試甫畢各
學官俱在率兵役守門稽出入而已眾悅守備遂嚴二十
四日鎖將兵起傳穉部署畢二十五日亦以兵二百鄉勇
二百繼之經阿公店南北適中地也民居頗稠畱兵勇二
百人使訓導謝代堦駐之以扼其衝道乃通二十六日至
埤頭撤功傑使紹祁回任署鎮亦撤其參將以朝龍代傳
穉乃督民夫增補竹圍繞圍濬深溝中插竹籤招撫逃民
諭各鄉守莊捕賊其先受賊約能自首者免罪紹祁更募
鄉勇八百名以四百人守埤頭四百人偕官兵捕賊縣役
中有通賊者不敢動而頗自危紹祁大度示之不復窮究
反側遂安賊自埤頭走黃梨山豎旗招眾鎮將初至不測
賊眾寡又以負險頗患之未遽擊既而名路兵屯鄉莊受

府縣約束阻守要隘甚密所在匪民觀望待起者不下數千賊不能通至是竟無敢應者嘉義賊將自內山潛至扼于王李二令皆散走吳賜至郡城爲慎彛獲誅新授臺灣鎮蔡萬齡亦至良斌見眾不集大懼其黨乃離兵勇進攻之遂潰傳穉紹祁亟懸重賞捕賊王曾李川蔡雙弼以下全獲伏誅良斌駕小舟入海逃至彰化縣令李振青獲之送郡南路遂平是役也自許尙起及竣事僅一月不煩內兵不使賊蹂躪閭閻南路辦賊北路宴如凡用餉銀數萬皆籌款補給不費帑金者郡縣得人之效也奏入

上大嘉之曰方傳穉總司籌辦悉協機宜特賞花翎鎮道以下各從優議敘明年乃建鳳山縣城於舊治

復建鳳山縣城

鳳山縣舊有土城在興隆里龜蛇二山之閒外有半屏打鼓二山環抱形勢天成康熙六十一年知縣劉光泗建雍正十二年知縣錢洙環植荊竹乾隆二十五年知縣王瑛曾於四門增建礮臺五十一年廢於莊大田之亂改治埤頭插竹爲城嘉慶十一年蔡牽攻臺灣吳淮泗乘閒陷埤頭頗有殘毀議者皆謂埤頭土薄水淺地苦潮溼不如舊城爽塏且負山面海形勢雄壯將軍賽公冲阿遂請移回舊治十五年總督方勤襄公維甸至臺相視奏如賽議改建以石並請圍龜山於城中以免敵人俯瞰費鉅部駁未行其後頗思捐建而民間未有應者道光三年勤襄從子傳穉署臺守瀕行總督趙文恪公令相度成之明年巡撫

東槎紀略

卷之一

五

孫公爾準巡臺復採輿論奏建適有楊良斌之亂傳穉議請官捐以爲民倡眾從之因爲檄諭諸紳士曰臺灣富庶之國也而困於兵燹亟矣自康熙二十二年入版圖三十五年則有吳球之亂四十年有劉卻之亂六十年有朱一貴之亂雍正九年吳福生亂于岡山乾隆三十五年黃教亂于大穆降五十一年林爽文莊大田相繼亂北路先陷南路應之六十年陳光愛陳周全相繼亂南路甫平北路旋失汪降之亂也在嘉慶五年許北之亂也在十五年中更閒以蔡牽之亂則吳淮泗陷鳳山矣胡杜侯之亂則陳錫宗據曾文矣百三十年變亂十一見近者楊良斌之事又用兵雖饒富其何堪乎且亂賊如吳球也朱一貴也莊大田也陳光愛也汪降與許北也吳淮泗與楊良斌也皆

鳳山之事前後十二亂鳳山獨居其八此一隅兵燹尤多者何也則近郡之故也譬諸一身郡城如心鳳山則元首也嘉則腹而彰則腰淡水直脛股耳嘉義以北關鍵重重鳳山逼近咽喉朝發而夕至中無屏障元首病則心以之豈腰腹脛股所能救哉此賊之所以常在于南也南路有事郡城必先受兵北路之賊乘閒再發則郡城恆有不及之勢故鳳山九重南路安則北路卽有事可無虞矣古者五十里之國必有三里之城今鳳山北自二贊行溪南至岷嶠二百二十里至沙馬磯頭四百里西至海東至傀儡山下亦百餘里而無城欲醜徒無覬覦之心不可得也鳳山舊城之宜建眾議僉同今將易土而石乃以費重久不舉行豈臺人好義之風稍衰乎惟無以倡之耳命匠計工

東槎紀略

卷之一

六

需番銀十二萬有奇願官與民分任之今本道衙門籌捐三千府捐一萬二千鳳山縣捐六千淡水臺灣嘉義彰化四廳縣捐一萬二千臺防同知捐二千五百鹿港澎湖噶瑪蘭三廳捐四千五百凡官捐者四萬外此不能不于士民是望臺人感動于是鳳山士民僉議納正供者每穀一石捐番銀一元凡四萬有奇富民別捐又四萬四千郡中紳商聞之亦捐二萬五千有奇傳檄乃選紳士黃化鯉吳尙新黃名標劉伊仲等爲城工總理分門鳩工不經胥役自與知縣杜紹祜親巡督之道光五年七月十五日興築六年八月十五日工竣爲石城周八百六十四丈城樓礮臺各四用番銀九萬二千一百又建知縣典史衙署各一倉廩監獄備具參將衙署一火藥局附用番銀二萬五千

以次興修尙餘銀三萬爲歲修之費巡撫韓公克均奏
聞議敘紳商有差其明年署淡水同知李慎彝亦勸捐建
城竹塹焉自是山前郡縣始皆有城矣

改設臺北營制

臺灣地勢延長自郡以南盡鳳山之沙馬磯頭四百五十里北至淡水之大鷄籠八百餘里郡城雖云中路實南偏也由郡至嘉義兩日至彰化四日至淡水七日噶瑪蘭在淡水極北山後自淡水至蘭城又六日溪嶺險惡生番出沒鎮道重兵皆在郡城控制遙遠舊制北路設副將一員中營都司一員駐彰化轄嘉義都司爲北路左營竹塹守備爲北路右營嘉慶十年蔡逆自滬尾登岸徑至新莊復移臺協水師右營遊擊駐淡水之艦舢兼轄水陸移延平協守備爲遊擊中軍又移興化協守備駐滬尾爲水師守備噶瑪蘭新設守備亦轄于艦舢於是艦舢遊擊轄三守備陸路自新莊以北至噶瑪蘭邊界三百餘里水路自大東槎紀略

卷之一

八

甲外洋北過八里坌繞鷄籠而南至蘇澳八百餘里道光三年五月總督趙文恪公檄臺灣鎮道府曰臺北道遠郡兵難以遙制北路副將駐彰化尙覺鞭長莫及艦舢遊擊所轄洋面尤寬兼轄陸路未免顧此失彼蘭廳有事恐難策應今欲以北路副將移駐竹塹改右營守備爲中營抽撥彰化額兵二百艦舢額兵一百歸竹塹守備隨副將駐劄改彰化都司爲北路左營改艦舢守備爲北路右營同蘭營守備四營統歸副將轄其嘉義都司改歸郡中城守參將轄如此則南可以應彰化北可以應噶瑪蘭形勢始爲扼要而艦舢水師遊擊亦得專事洋面水陸兩路均可得力矣蘭境新開額設守備一員千總一員把總二員戰守兵四百名其地逼近生番兵力尙薄擬增設都司一員

駐五圍城內守備移駐頭圍千總移駐三貂復設在城千
總一員外委二員戰兵一百二十名守兵八十名庶巡防
周密其俸薪養廉馬乾兵餉就蘭廳正供餘租支給不敷
則以鹽課稅契畱支此項額兵毋庸內遣可自臺灣城守
嘉義二營抽撥衙署兵房移建增設費如何籌其悉心會
議總兵觀公喜議將遵檄而水師提督在臺謂是減艦舩
水師事權也北路副將亦貪彰化富庶不願移營道府惑
其說乃覆議請北協駐彰化如故改艦舩遊擊爲參將以
大其階撥城守北左艦舩三營兵三百入蘭增設都司千
總如檄其撥兵分汛廉俸糧餉皆未籌也十月方傳稔至
臺觀鎮軍以告爲艦舩事有成議不及爭未幾傳稔署道
乃會詳蘭營之制曰蘭地民人三籍漳最多泉粵人少漳

東槎紀略

卷之一

九

泉兵不可用也請悉用上府兵以免分類械鬥之隙臺灣
城守左右兩軍舊額一千一百六十七名可撥左軍岡山
汛兵四十右軍大武壠汛兵三十北路左營原額一千二
百六十八名可撥嘉義存城兵八十斗六門汛兵三十鹽
水港西螺二汛兵二十艦舩陸路原額兵八百名可撥艦
舩汛兵一百凡撥戰兵二百守兵一百以入蘭營其蘭營
形勢五圍城中最要原設守備把總外委各一員額外二
員兵丁二百一十五名請改駐都司一員在城千總一員
外委二員額外二員戰守兵三百六十頭圍北當北關東
扼烏石港人煙稠密地方孔要原設千總一員兵六十名
請改駐守備一員外委一員戰守兵一百隆隆嶺汛爲淡
蘭二廳交界接連三貂大嶺俯瞰鷄籠卯鼻茂林峻嶺匪

民之所逃匿也舊有石堡設額外一員兵二十名請改設千總一員戰守兵五十名馬賽草山之外曰蘇灣接界生番東臨大海可泊大小百艘昔蔡牽朱潰二逆屢泊舟於此以窺噶瑪蘭至今南風盛發土匪小船時有藏泊山坑亦有民人私墾昔楊廷理原議于草山下建立南關然地勢平闊關未易建不若于山上建立礮臺土堡以防蘇灣請設把總一員戰守兵五十防守邊界堵緝洋匪加禮遠港在東勢大溪出海之口也沿港皆番社港口僅容小船出入楊廷理原議建礮臺於此似可毋庸請設額外一員兵丁三十名稽查挂驗餘若溪洲汛爲東勢適中向設把總一員兵四十名北關汛在梗枋爲入蘭鎖鑰向設外委一員兵四十名三圍汛在蘭城西北向設兵十名請仍其

東槎紀略

卷之一

十

舊惟礮臺塘在烏石港口向設兵十名今增五名以上蘭營新增舊設凡都司一員守備一員千總二員把總二員外委四員額外三員戰守兵六百九十五名以爲定制噶瑪蘭年額征餘租番銀一萬八千六百六十八元折紋銀一萬三千三百三十四兩額編文員廉俸祭祀役食銀一千四百零二兩原設蘭營官兵廉俸乾餉銀七千二百二十六兩故兵白事運殖運樞班兵盤費車價銀六百兩遇閏多支餉銀五百三十兩僅存三千五百餘兩蘭營原定戍兵加餉歲支銀一千九百一十兩於鹽課支給餘銀不及二百兩今新設官弁兵丁年支廉俸乾餉需銀五千五百一十三兩逢閏多支餉銀四百又新兵加餉全年銀一千四百四十兩蘭地所存餘租鹽課不敷而稅契年無定

額應請舊制如故新設營員俸薪廉乾及戍兵加餉均于
鹽課餘租動支尙有贏爲故兵白事諸用其新增兵額乃
由城守北左艦舡三營抽撥其餉銀四千八百兩及逢閏
多支餉銀四百兩本有臺府大餉之額請仍於府庫關支
蘭廳年額征供耗穀一萬四百五十八石蘭營新舊兵丁
年支米二千五百二十七石二斗逢閏加支兵米二百一
十石六斗盡由蘭倉支給此抽兵分汛及俸餉兵米之大
略也蘭營守備存城把總頭圍千總溪洲把總舊皆有署
今改建各官但稍爲增廓城中更造兵房三十間楊廷理
原議加禮遠港建礮臺馬賽山下建南關今改建礮臺於
蘇灣則南關之費可省惟蘇灣草山上築一土堡以圍礮
臺設把總署及兵房二十間加禮遠港建外委公所及兵
房十間費省而工易竣所有艦舡遊擊改爲淡水營參將
與新設噶瑪蘭營都司千總印信鈐記咨部鑄造更給可
也道光四年二月議上文恪公悉奏行之

改配臺北班兵

臺灣一鎮水陸十六營班兵一萬四千六百五十六名自內地五十三營遣戍三年更替至臺分入各營戍滿由鹿耳門配舟內渡此舊制也臺北各營至郡道遠跋涉維艱嘉慶十五年總督方公維甸奏嘉義以北班兵改由鹿港登舟時以爲便旣而港門淤淺船少兵眾候配需時定例班滿出營卽停給糧餉雖准借支盤費回本營坐扣而所借無多其初調戍也皆至廈門提督點驗惟水提金門兩標最便上府各標自五六站至十七八站不等點驗配船候風東渡至臺後中營北協兩次點驗然後入艚蘭兩營歸汛道遠時久沿途已有借貸三年戍滿每不能償瀕行借支盤費輒以償還依然枵腹羣環帶兵官乞借爲之賠

東槎紀略

卷之一

三

墊無以給至或被毆以故帶弁畏之尤甚所在廳縣常爲所叟而船戶之騷擾無敢言者商亦苦之道光三年鹿港行商求與淡水之八里坌口分船配載趙文恪公行鎮道府議四年正月方傳穉署臺道以問鹿港同知鄧傳安署淡水同知龐周皆言兵商之困傳穉乃與總兵觀公喜議覆曰臺灣三口對渡鹿耳門與同安廈門對鹿港與泉州蚶江對八里坌與福州五虎門對戍兵往來本可量地配載徒爲向例廈門臺郡點驗之故跋涉迂途臺灣北協中左右三營兵三千一百十名艦艚參將水陸二營并蘭營新舊兵二千二百一十四名凡五千三百五十四名盡由鹿港一口配舟八里坌并無配載商人苦樂不均且帶弁有賠墊之苦亦難責其鈐束官與兵商三者皆不便亟宜

量爲變通請以蘭艦滬尾北右四營中上府兵二千二百四十一名改由艦舦參將點驗自八里坌配渡徑入五虎門四營中下府兵與北協三營兵仍由鹿港如故其內地換班來臺應撥蘭艦滬尾北右四營者亦請以督標福協延建邵汀福甯長福海壇閩安羅源連江桐山楓嶺烽火諸營上府兵由督協或福協點驗合閩安協酌撥福甯烽火閩安諸營水師哨船配載有不敷令福防同知封雇商船協載均自五虎門竟渡八里坌登岸由艦舦參將點驗分收各營仍如鹿耳門向例卽順載戍滿各兵回內商船每兵一名減配官穀三斗惟蘭營中有興化兵數十名雖非上府而距福州甚近且素與漳泉兵不和請皆由省點驗配載戍滿之日亦由艦舦參將點驗自八里坌配渡歸

營如此則戍兵來往無跋涉之勞帶兵可免賸墊之苦而商船亦不致偏困之嗟矣文恪公如議奏入遂以施行今載兵冊於後以見臺營大略俾考營制者有所稽焉

艦舦營參將轄艦舦陸營兵七百七名

羅源營兵一百七名內外委一員

桐山營兵七十名內外委一員

長福營右軍兵三十六名內額外一員

福甯鎮右營兵一十八名內外委一員

建甯鎮中營兵一十六名內外委一員

督標右營額外一員

楓嶺營兵六名

延平協右營兵一十三名

右艦艍營舊額上府兵二百六十七名

海壇鎮右營兵一十八名

海壇鎮左營兵四十六名

烽火營兵一十八名

閩安協左營兵三十三名

閩安協右營兵五十名

督標水師營兵五十名

右艦艍營新撥入上府兵二百一十五名

艦艍營參將轄滬尾水師營兵七百七名

督標水師營兵一十五名

海壇鎮左營兵五十六名內外委一員

海壇鎮右營兵五十九名

東槎紀略

卷之一

齒

烽火門營兵二百四十四名內外委一員

福甯鎮左營兵一十九名內外額外一員

閩安協左營兵二十一

閩安協右營兵二十一

右滬尾水師營上府兵四百三十五名

艦艍營參將轄噶瑪蘭營新舊兵七百二名

延平協左營兵四十二名內外委一員

延平協右營兵四十一名內外委一員

建甯鎮中營兵四十二名

建甯鎮左營兵四十一名

建甯鎮右營兵四十一名

汀州鎮中營兵三十五名

汀州鎮左營兵三十六名

汀州鎮右營兵三十七名內額外一員

邵武協左營兵四十一名內額外一員

邵武協右營兵四十一名內額外一員

右噶瑪蘭營舊額上府兵三百九十七名

福甯鎮右營兵三十三名

海壇鎮右營兵七名

建甯鎮中營兵一十四名

建甯鎮左營兵十名

建甯鎮右營兵六名

福甯鎮中營兵三十名

連江營兵五十名

東槎紀略

卷之一

五

長福營右軍兵五十名

羅源營兵三十五名

長福營左軍兵十名

連江營兵十二名

延平左營兵十三名

興化協左營兵十五名

興化協右營兵十五名

右噶瑪蘭營新撥上府兵三百名

北路協轄竹塹右營兵七百二十六名

福甯鎮中營外委一員

福甯鎮右營兵一百三十三名內外委一員

福州協右營兵一十八名

建甯鎮右營兵一百六十四名內外委一員

長福營左軍兵七十三名內外委一員

桐山營兵一百零五名

楓嶺營兵一百零八名內外委一員

海壇鎮左營兵二十二名

右北路右營上府兵六百二十四名

以上艦艍滬尾噶瑪蘭北右凡四營上府兵二千二百四十一名由八里坌配渡入五虎門

艦艍參將轄艦艍陸營內

金門鎮左營兵五十名

金門鎮右營兵五十名

水提標中營兵二十五名

東槎紀略

卷之一

十六

水提標左營兵二十五名

水提標右營兵二十五名

水提標前營兵二十五名

水提標後營兵二十五名

右艦艍營新撥下府兵二百二十五名

艦艍參將轄滬尾水師營內

銅山營兵七十九名內額外一員

金門鎮右營兵二十六名內外委一員額外一員

水提標中營兵二十三名

水提標左營兵二十三名

水提標右營兵二十四名內外委一員

水提標前營兵二十三名

水提標後營兵二十三名
金門鎮左營兵二十四名
南澳鎮左營兵二十七名

右滬尾營下府水師兵二百七十二名
北路協轄竹塹右營內

陸提標前營兵五十四名內外委一員
陸提標後營兵四十三名內外委一員額外二員
漳州鎮右營兵五名

右北路右營下府兵一百零二名
合前蘭艋三營共下府兵五百九十九名仍由鹿港
配渡蚶江

籌給艚船營兵米

嘉慶十一年蔡牽自滬尾登岸蹂躪新莊艚船十五年乃設艚船一營兼轄水陸兵一千四百兵米仰給於淡防廳倉而額征供耗穀不敷者每年六千二百七十石借碾備貯倉貯已空復借屯租屯租者淡廳每歲協濟臺鳳二邑屯丁之餉也二邑屯丁索餉當事患之而艚船兵米尤急部議噶瑪蘭存倉餘穀臺鳳嘉彰四縣截曠兵米盡數撥補不足由司發價採買臺灣道胡承珙遵檄議曰淡防廳冊報嘉慶十五年起墊給艚船兵米以本營截曠同存餘供穀撥補并藩司發銀一萬一千三百兩採買尙未補穀三萬五千八百二十九石此二十五年以前之數也各縣扣存截曠兵米內彰化一縣本營加潤兵米不敷不可撥

東槎紀略

卷之一

六

道光元年以前臺鳳嘉三縣扣存截曠穀七千零七十石噶瑪蘭征存供耗穀一萬六千七百四十石以補淡倉尙不敷一萬二千餘石與道光元年後應給之兵米請以三縣截曠及蘭廳存穀自元年起年約七千石運赴淡倉給新兵額米且陸續歸補墊穀惟陸運費繁當由海運三縣運至鹿耳門灣臺防廳就往淡水貿易之艚船配運令行戶保結其蘭廳餘穀每年春夏閒淡防廳雇船往運照臺運章程內洋被劫地方官賠補外洋被劫營弁買賠船至內港駕駛不慎攔損或船戶中途盜賣者行戶賠補外洋遭風咨部豁免至運腳費及淡廳年征拳和官莊租穀變價銀六百六十九兩給發其二十五年以前廳縣應補穀二萬三千八百餘石腳費無項可支令二廳三縣攤捐議

上司道請咨趙文恪公疑之未行道光四年三月傳稔署
臺道覆議曰淡廳所急者每年支放新增之兵米也新支
一日不定則舊墊一日不清造冊頻更糾纏殊甚部中查
取者嘉慶十八年以前墊給之數而承珙所議則淡廳現
送二十五年續造之冊較前數已增其道光元二三年墊
給之數將來造冊又不止三萬五千八百餘石而已此時
卽計補還亦難清訖且廳中歷年借款有本廳及府倉備
貯之穀有司庫發價採買之銀有協濟臺鳳二邑屯餉本
廳應解稅契及拳和莊租之銀或係外款礙難報部或係
借銀不能還穀又如各縣屯餉亟待支放而司庫發價則
無用歸還種種不同未能一律惟有先籌當年之穀毋庸
再墊然後歷年借數可以截清或分別歸補或准予開銷

東槎紀略

卷之一

十九

此撥補之中後先緩急所當分計者也各縣截曠米穀嘉
慶二十三年後現冊臺灣存二千五百九十一石鳳山存
三千三百零二石嘉義存一千一百七十六石彰化存八
百九十三石雖奉部議盡數撥補但彰化縣年額支放兵
米無閏之年餘穀有限五年再閏卽已短缺不得不將截
曠存留而鳳山自蔡逆軍需之案所有備貯焚搶無餘每
年供穀支放兵米可餘二千再收回曠米穀年可一千餘
石若以留補本倉則十年之後卽可歸補大半嘉慶二十
五年前人悞以此穀代嘉彰兩邑運回內地補二十二年
前民欠之額置本邑倉儲于不問已爲失計若再以撥補
淡廳則鳳邑淡廳事同一律豈可顧彼失此承珙但知彰
化之穀當留不知鳳山之穀尤不可撥此情形所當通計

者也至于海道運穀既責令三邑運赴鹿耳門灣又設立行保責令往淡艍船按樑頭大小配載而蘭廳之穀又令淡廳專雇船隻往運及至遭風被劫又責令地方文武及行保分別著賠不但舉動紛煩爲官商日後無窮之累且艍船之大不及千石鹿耳門往來載民間日用貨物者臺灣鳳山嘉義三縣耳淡水艍船踞郡寫遠貨船向無往來安得多船配運即使有船而近年內地商船配運已多困累尙當妥議章程豈可使此等小船又滋弊害此又民間久遠之累所當深計者也艍船滬尾兩營原增戍兵八百七十一名歲支米折穀六千二百七十一石遇閏加給米折穀五百二十二石六斗者此乃道光四年以前之數現在改議營制抽撥艍船營兵一百名入噶瑪蘭營則蘭廳

之兵穀有增而淡廳之兵穀可減據淡廳造送冊內無閏之年扣除截曠實支兩營新增兵米穀不過五千八百餘石逢閏多支五百餘石今減兵百名則無閏之年實支五千二百餘石逢閏乃五千六百餘石耳淡廳年額征供穀一萬三千零七十石淡水北路中右營實支兵米穀無閏之年一萬一千二百餘石尙存一千八百餘石逢閏多支六百餘石應存贖穀一千二百餘石以兩年無閏之穀并計爲數尙多然則每年不敷之數實不過四千石而已噶瑪蘭年額供耗穀一萬四百五十八石除本營新舊戍兵歲支五千餘石外可撥給淡廳四千卽此一款已敷支放毋庸撥動四縣截曠以免每年海運之紛煩日後官商之貽累并請如噶瑪蘭呂倅所議由蘭廳將穀變價番銀四

千員齎赴淡廳遞年輪買米穀放給或民價昂貴蘭廳輪買之年由噶瑪蘭通判籌款湊補淡廳輪買之年則以拳和莊租銀准其開銷既可免海運腳費與遭風賠累又可免頻年採買騷擾閭閻其事并無窒礙如蒙憲准則自本年爲始卽飭蘭廳在于額征穀內動撥四千石秋收後齎赴淡廳預先買穀存倉以爲來年兵食如此則艦舫兵米不敷墊給之數可自本年截清而道光五年以後皆預運一年無墊給之虞矣墊數截清然後飭令淡廳將歷年墊給之款分別銀穀何者當還何者毋庸歸補何者急需何者可緩數目截清事乃有緒卽如現據淡廳查覆兵米案內借動臺鳳二邑協濟屯餉一款自嘉慶二十一年至道光四年共未解番銀一萬八千三百五十元此墊款中之

東槎紀略

卷之一

三

亟當先還者也噶瑪蘭通判呂志恆造送蘭廳支銷冊內截至道光元年冬季除備貯穀二萬石外實存倉供耗穀二萬三千二百九十五石卽係應撥補淡廳之數而蘭廳一帶海道艱險遭風失水卽干著賠且烏石港口門淺窄只容三五百石小船運穀至二萬三千餘石需封雇民船六七十隻小民殊多不便卑護道現于清查屯租案內詳請將蘭廳應撥之穀照餘租例每石變糶番銀一元先以淡廳協濟屯餉一款代解府庫飭臺鳳二邑領回發給屯丁清款尙餘番銀四千九百四十五元撥解淡廳同本年應協濟臺鳳屯租番銀四千六百五十元并存淡廳收貯分年買補歸還墊款至于截曠米石除鳳彰二邑免撥外每年臺邑約可收回穀八百餘石嘉邑約可收回穀四百

餘石艤船配運赴淡實多不便查淡廳墊給兵米內有借
動府倉備貯穀九千五百石請飭令臺嘉二邑將此項截
曠三年一次就近撥解府倉代還淡廳之款俟府倉借款
還清卽行停止如此通計則艦舩新兵之米有出而淡廳
墊給之數可清矣議上文恪公乃與巡撫咨部行之全臺
稱便

籌議商運臺穀

閩省內地水陸官兵五十三營與駐防旗兵不下十萬歲征糧米惟延平建甯邵武汀州興化五府產米之區給兵外尚有贏米以濟他府福州福甯泉州漳州四府兵多米少協濟猶不足則半給折色督標金廈漳鎮銅山雲霄龍巖南澳諸營有全折者雍正閒先後題請半支本色於臺灣額征供粟內撥運嗣又增給戍臺兵眷米亦以臺穀運給于是臺灣歲運內地兵眷米穀八萬五千二百九十七石有閩之年八萬九千五百九十五石乾隆十一年巡撫周學健奏定分配商船運赴各倉此商運臺穀所由來也臺灣商船皆漳泉富民所製五十九年水災後二府械鬥之風大熾蔡牽騷擾海上軍興幾二十年漳泉之民益困

東槎紀略

卷之一

三

臺灣亦做百貨蕭條海船遭風艱于複製而泛海之艘日稀于是臺穀不能時至內地兵糈孔亟廳縣皆借碾備貯而倉儲空矣商船大者載貨六七千石小者二三千石定制樑頭寬二丈以上者配官穀一百八十石一丈六尺以上者配穀一百三十石每石給運腳銀六分六釐初無所苦既而運穀至倉官吏多所挑剔而民貨一石水腳銀三錢至六錢不等又商船自臺載貨至甯波上海膠州天津遠者或至盛京然後還閩往返經半年以上官穀在船久懼海氣蒸變故臺地配穀私皆易銀置貨其返也亦折色交倉不可然後買穀以應官吏挾持爲利久之遂成陋規于是內地有臺穀廳縣皆賴以濟公如江浙之漕焉嘉慶十四年總督方公維甸以臺穀積滯奏開八里坌口與鹿

耳門鹿仔港一律配運凡渡海漁船樑頭寬五尺以上至一丈二尺者皆令配穀三十石至八十餘石然姦商詭請往往減報樑頭巧爲規避官穀積滯如故十六年總督汪公志伊奏請專雇商船委文武大員至臺運穀十萬二三十年復雇運七萬先是彰化縣知縣楊桂森嘗建言請臺地改征折色奏停臺運省議不可姦民盧允霞者以健訟遣戍赦歸在鹿港聞之曰此奇貨也謂所善商人我能革除陋規眾惑之以爲謀主乃設館抽各船戶錢給允霞爲訟費然獨鹿港十數家其臺郡及泉廈眾商船不願也二十五年臺澎道葉公世倬至自鹿港受其膚慙以爲商果病也欲除其弊以卹商議罷商人配穀請製官船海運以語臺灣縣姚瑩瑩曰臺穀歲十萬石舟以二千爲率法當

用五十艘一艘工料五千爲率當費金二十五萬既有糧艘必用弁兵管駕并舵工水手每舟不下數十人歲費金又數萬海舟駕駛三年當一修費又數萬重洋風濤不測一有沈失則舟穀兩亡是漕艘之外又增

國家一病也不可行葉公疑其有私及爲巡撫力持前說未及改制罷去趙文恪公與孫公爾準爲督撫患商運不前屬臺灣府方傳穉籌之傳穉以鹿港口門淤淺商舟不前道光四年採輿論請開五條港利商船而是年乃奉

旨運米十四萬至天津免配兵穀者六十餘艘配運之船益少傳穉議曰今雖極力疏通不足運本年之額計來歲積欠當十三萬以上勢必又需雇運然非善策也重洋險阻商船往來歲有漂沈平時配運止百餘石糖市倍之卽

失水責償爲數無多故行之可久若雇船專運每船奚止十倍設有不虞官商皆難著賠雖前已三次行之而未可恃也昔時商本豐厚其船工料堅固近今商船薄小南北洋中沈碎者多民間置貨千石猶必分寄數船以防意外官穀豈可不加鄭重乎積穀十三萬用商船六七十艘廈蚶二廳雇撥當爲四起或五六起每起必有文武正副委員及護送弁兵供應犒賞皆取諸四縣賠累已甚而內地各倉旣失商運之利則必多所挑駁非云穀雜糠沙則云斗斛不足紛紛檄行四縣補運此累之在官者也官穀運脚每石六分六釐較民貨水脚僅十分之二每船以二千石爲率船戶僅得運脚銀一百餘兩不敷舵水飯食工資其船本及修整蓬索桅旋之需皆於何出每逢雇運眾行

商及通港之船皆科派津貼而船戶仍不免賠此累之在商者也臺灣三口來往商船只有此數旣專運積穀則明年新穀必有短配是爲疏積欠反增新欠亦非計之得者况臺地近年米貴一聞雇運民間米價必一時騰踴匪類藉以滋事是官商旣病而并以病民傳穢之愚惟有暫停新穀以折色支放兵食盡配積穀免雇運而補倉儲請飭下臺灣廳縣查明欠運穀數至本年止實若干石照舊配運其道光五年新穀令四縣盡數易銀按中平市價每一石易價番銀一元三角分四季解至內地福州廈防廳庫收貯有穀廳縣領回按月折放兵食內地番銀一元可易制錢八百餘文以二穀一米計之每米一斗可折放制錢二百文其內外廳縣領解番銀脚費平水卽以商運例給

之腳價予之俟積穀運竣仍配新穀如舊數年之後再有積穀亦可倣此而行則永免雇運之害而臺灣之積穀可清內地之倉儲可補矣文恪公深然之水師提督許公松年力阻其議適盧允霞入京師上控求罷商運事下督撫議司道乃採楊桂森之說停止商運請臺地供粟半收本色以給臺營半收折色每穀一石改征銀一兩二錢以給內營卽全數劃抵臺灣兵餉臺地免一領一解之煩內地免解餉遭風之慮每年又可省運腳銀六千餘兩文恪公曰閩省漳泉諸府負山環海田少民多出米不敷民食臺郡產米之區故令征收本色運給內營兵食原以臺地之有餘濟內營之不足今不令將本色運內濟兵轉使改解折色已失立法之本意况臺府請暫停一年改解折色司

東槎紀略

卷之一

三

道已慮米價昂貴營員藉口若此後盡解折色豈米價獨可無慮耶臺郡各屬征收供粟向無半本半折之例方守所議暫解折色一年猶屬一時通融之計尙可由官酌辦若改征半折則臺民有穀之家較多紛紛糶穀完銀必有平水火耗之加更滋流弊是利商以病民也更易舊章未可草率其再議之于是臺灣道孔昭虔臺灣府方傳穉臺防同知杜紹祚鹿港同知鄧傳安淡水同知吳性誠臺灣縣李慎彝嘉義縣王衍慶會議皆謂商運不可罷臺民間將改折大譁紳士咸曰民間完納正供已百餘年雖今昔情形不同私有折色亦皆按時價之低昂并無一定若改征折色每穀一石征銀一兩二錢轉成定例行之日久勢必又有加征平水火耗將來受累更深且臺民市易皆用

番餅并無紋銀全賴每年兵餉散佈民間紋番兩便故錢價得平若大餉永停則紋銀漸絕番餅增昂必致民商兩困大不便時孫公亦以改折抵餉之說密訪于傳穉傳穉覆書曰今之紛紛言商病者皆務虛名未計其實也商船往來臺洋一次販貨之獲利與船戶之水腳所得凡數千金以數千石之船僅運百餘石之官穀復給以每石六分有奇之運價

國家恤商可謂厚矣何病之有所謂病者有司之陋規耳有

國法在罪之可也裁之可也今乃改易舊章設有他弊又何以處之自古無不做之法利之所在弊即生焉苟鑿于末流遂并公其本是爲因噎廢食烏可不之察乎夫商船東槎紀略

卷之一

一

運穀雖以養兵其端亦原于正供臺地產穀之區頗艱銀貨故昔人因地定賦有供粟而無地丁雖有勻丁雜稅爲數無幾而漳泉福州兵民繁庶產穀不足故以有易無運臺穀以濟各郡之兵糈發

帑銀以給全臺之兵餉各得其所民間便之久矣雖近時臺屬之正供不無折收內地之兵米不無折放船戶之運穀不無折交然名存法在每有需穀之時猶可立備一經改制則內地永無得穀之期臺地永無見銀之日一旦實需其用反費周章其不便者一臺屬貿易俱用番餅官民收用紋銀皆仰給于臺餉給兵之後散佈民間舍此則海外紋銀斷絕矣其不便者二全臺兵餉歲發銀二十一萬一千有奇逢閏年發銀二十二萬六千有奇又加餉銀六

萬七千有奇臺屬額征鹽課叛產官莊雜項錢糧捐款盡數劃扣歷年司中尙應發銀十四五萬有奇今以通臺運穀折價卽使年清無欠裁十萬耳不足抵大餉之數設歲有歉收民欠積累則支絀立形海外兵餉攸關貽誤匪細其不便者三自古三代不廢力役之征國有徵發里出車徒馬牛惟所用唐定租庸調之法史猶稱善蓋軍國之需不能不資民力匪特賴以濟事也亦陰以維持上下使民知起事赴功尊君親上之義故民安其分而忘其勞今西北直省猶有車馬差徭故其民情愿樸而以奉公爲分所應爾東南諸省民俗澆偷一切便民猶謗其上者不知分與義也海船無他徭役官使往來皆予雇值獨過臺配載軍工回棹配載運穀此二事尙有奉公之意耳然亦有水

脚之給雖稍賠費亦由船戶自圖巧利爲口員胥吏之所挾持雖成陋規非無故而致也若裁去運穀則商船自此不識奉公之義設一旦有意外之徵發反相與嗟怨以爲不當役使之矣履霜堅冰由來有漸其不便者四盧允雷一無賴訟棍耳昔嘗以唆訟擬遣逢

恩赦歸又盤踞鹿港倡爲邪說煽惑商民假控革陋規之名設立公館每船抽費銀數十是以奸民橫征暴斂也各商船戶惟泉郊數人稍稍附之餘皆已悟其姦有赴廳控其假公斂費者此前歲鄧丞所以往毀其館也彼挾此恨又爲眾船戶所歸尤故冒成叩闥以塞眾人之責始因斂費而控陋規繼則因陋規而條陳改制是一姦民而敢恣橫議變亂

祖宗成法矣雖停罷商運之議啟自楊桂森然桂森之議昔已不行今則因盧允霞之控而行之是姦民舞智反優于邑令之建言也此風一開異時必有紛紛效尤競議國政者語云天下有道則政不在大夫乃反在姦民可乎其未便者五州縣親民之官必使有力辦公乃可不形竭蹶臺穀之陋規不但內地各屬賴之者多卽臺屬廳縣亦有折半征收之利每穀一石折收番銀二元或一元八角可當紋銀一兩四錢或二三錢今使以半折抵給臺餉則官無絲毫之餘羨而廳縣從此大困矣海外經費無一不倍內地幕友脩金歲常四五千金捐賠之款又一二千兩廉俸無幾何以供之非盡爲入橐肥私之計也其不便者六雖有廉吏亦必俾能自給然後不侵

東槎紀略

卷之一

五

國帑不朘民膏陋規改盡勢必虧空倉庫否則詞訟案牘剖克贓私民間受禍更烈海外隱憂方自此深矣其不便者七夫病商之弊其害猶小若以便商之故而病官與民因以病

國則其害甚鉅古之爲政者利均則權之以義害均則權之以大小輕重不可不謹也

本朝制度寬大一切便民或因時損益小有變通則可若竟廢前人之法竊恐貽悔他時書上孫公納之文恪公與傳穉書曰比閱陳議所見正同事關

國制不可不盡言也然已違眾議不罷商運傳穉所云運舊停新之策亦遂置之明年仍雇運焉傳穉復請爲減運之法曰比閱臺灣三口運穀冊數每年積壓約二萬以上

若減運眷穀則無積矣眷穀者非戍兵正糧也每戍兵一名月給眷米一斗歲運二萬六千餘石各兵眷歷年米粟皆轉以賣錢并不赴倉領米莫如照臺穀平價每米一石折予紋銀一兩藩司于臺餉扣發臺屬以折色納府抵大餉焉是時文恪公已去閩省議雖暫行之而未能奏咨傳稷旋亦內渡矣

籌建鹿耳門礮臺

道光三年七月臺灣大風雨鹿耳門內海沙驟長變爲陸地四年三月總兵觀喜署道方傳穉署府鄧傳安上議建礮臺于鹿耳門其略曰臺灣孤懸海外屏幃四省郡城根本重地設險預防尤爲緊要鹿耳門一口百餘年來號稱天險者蓋外洋至此波濤浩瀚不見口門水底沙線橫互舟行一經攔淺立時破碎其中港門深僅丈餘非插標乘潮不可出入此險之在外者也口內出水沙線二道橫互南北爲其內戶南線又名北線尾大船入口更易小船循此線內東南行二十里過安平鎮爲入郡咽喉更東十里然後達郡北線又名海翁隙其內可泊大船自此至岸亦二十餘里爲郡北之洲仔尾及嘉義縣地水深浪湧舟不能近無由登陸此險之在內者也往時僞鄭重兵皆守安平恃鹿耳門之險不爲設防

東槎紀略

卷之一

三

王師平臺乘潮一入鄭氏面縛輸誠朱逆之亂郡城已陷賊亦恃此門不爲設備大兵再入朱逆授首

本朝定制臺協水師副將駐守安平以防大港而鹿耳門口以水師中右兩營遊擊輪巡防守嘉慶十年前鎮道議奏添善字號梭船三十隻專守鹿耳門可謂周密然十一年蔡逆猶進鹿耳門直薄郡城則所謂天險者果何如也其時天設之險無恙而已如此今則海道變遷鹿耳門內形勢大異上年七月風雨海沙驟長當時但覺軍工廠一帶沙淤廠中戰艦不能出入乃十月以後北自嘉義之會文南至郡城之小北門外四十餘里東自洲仔尾海岸西

至鹿耳門內十五六里瀰漫浩瀚之區忽已水涸沙高變爲陸埔漸有民人搭蓋草蓐居然魚市自埔上西望鹿耳門不過咫尺北線內深水二三里卽係淺水至埔約五六里現際春水潮大水裁尺許秋冬之後可以撩衣而涉自安平東望埔上魚市如隔一溝昔時郡內三郊商貨皆用小船由內海驟運至鹿耳門今則轉由安平大港外始能出入目前如此更數十年繼長增高恐鹿耳門卽可登岸無事更過安平則向之所謂內險已無所據依北路空虛殊爲可慮非於鹿耳門對岸埔上建築礮臺守以偏師幾無屏障矣康熙年間鹿耳門舊有礮臺其後不知何時傾失遂未再建考府縣誌自乾隆年間至今營制安平副將所轄中營礮臺七座蚊港汛四大港汛三左營礮臺七座

東槎紀略

卷之一

三

安平鎮三笨港海豐港三林港鹿仔港各一右營礮臺五座在打鼓港而鹿耳門重地獨無礮臺之設僅中營有礮架八座右營有礮架七座爲守鹿耳門之用而已竊疑前人定制不應疎略推原其故蓋以鹿耳門口水勢浩漫說者皆謂南北二線海上浮沙易於陷沒不能建設建礮臺亦無處可設營汛故嘉慶十年新議亦止添造梭船然南線舊建天后宮已百餘年其左右文武二館爲臺防同知安平中右營員稽查商船出入挂驗之所至今未見淪陷豈以之查驗商船則可以之防禦外患則不可乎人情喜逸惡勞避難趨易於此可見况今昔形勢不同宜爲百年之計新長陸埔未久潮長時海水猶不無漬溼且地勢平闊未有要隘應俟三五年後民居漸稠地土堅實移安平

右營於此以當北路之衝其鹿耳門南線天后宮請先建築礮臺圍以土堡使巡防鹿耳門之兵有所據依以堡衛兵以兵衛礮然後鹿耳之險庶乎可據省議以道光元年甫有鹿耳門不能建築礮臺之奏未便岐異更俟數年後議之遂不果建今存其說於此以待來者

埔裏社紀略

埔裏社者臺灣彰化縣之歸化番社也其地在彰化東南山內爲社二十有四府志所載曰埔裏曰泐裏曰毛啐曰貓丹曰社仔曰木扣曰木武郡曰子黑曰子希曰倒咯曰巒巒曰田仔曰貓蘭曰田頭曰思順曰挽蘭曰外斗截曰水眉裏曰內斗截曰內倉裏曰平來萬曰致霧曰哆咯囉曰福骨凡二十四社埔裏特其一耳距縣治九十餘里中隔大山路徑崎曲難通其入社之道有二南路自水沙連沿觸口大溪東行越獅仔頭山至集集舖廣盛莊更越山東行十里至水裏社之柴圍又北逾鷄胸嶺芋藜林竹仔林十五里而至水裏之頭社地頗平廣皆番墾成田甚熟更進八里則爲水社中有大潭廣可七八里潭中有小山

東槎紀略

卷之一

三四

名珠仔山番皆遶山而居番俗六考所謂青嶂白波雲水飛動海外別一洞天者也潭之東岸爲剝骨社西岸則水裏本社其番頗饒裕善種田能織蒟毯番皆白皙俊好府志稱之遶潭更北行逾山七里至貓蘭社又北五里至沈鹿地頗寬廣迤西復入山几十里谷口極狹幾於一丸可封最爲險要名曰銜口過此以北始爲埔裏大社地勢平闊周圍可三十餘里南北有二溪皆白內山出南爲濁水溪源北則烏溪源也烏溪爲入社北路自彰化縣東之北投北行過草鞋墩至內木柵阿發埔渡溪東北行至火燄山下五里過大平林入山十里逾內龜洋至外國勝埔更渡溪而南二十五里至埔裏社白水沙連入可兩日程北路爲近然常有兇番出沒人不敢行故多從水沙連入水

沙連則番社之久輸貢賦者也蓋埔裏乃界外番社例禁越墾故漢人圖墾則假名於水沙連耳相傳埔裏社更東北越山五日行即通噶瑪蘭東南則奇來及秀姑蘭一帶番俗六考云水沙連屬番二十餘社各依山築居山谷巉巖路逕崎嶇惟南北兩澗沿岸堪往來外通斗六門竹腳繫乃各社總路隘口通事築室居焉余謂南北兩澗即觸口與烏溪也斗六門爲嘉義所轄距彰屬水沙連頗遠蓋萬斗六之訛耳府志言康熙六十年阿里山水沙連各社乘亂殺通事以叛六十一年邑令孫魯多方招徠示以兵威賞以煙布銀乃就撫自後無聞焉乾隆五十三年開屯各社遵設屯丁水裏埔裏二社內有屯田一百餘甲其番自耕田亦百餘甲未墾荒埔無數嘉慶十九年有水沙連

東槎紀略

卷之一

三五

隘丁首黃林旺結嘉彰二邑民人陳大用郭百年及臺府門丁黃里仁貪其膏腴假已故生番通事土目赴府言積欠番餉番食無資請將祖遺水裏埔裏二社埔地踏界給漢人佃耕知府某許之大用隨出承墾先完欠餉約墾成代二社承納餘給社眾糧食儻地土肥沃墾成田園甲數仍請陞科以裕

國課二十年春遂給府示并飭彰化縣予照使墾然未之詳報也其受約者僅水沙連社番而已二十四社皆不知所爲郭百年既得示照遂擁眾入山先於水沙連界外社仔墾番埔三百餘甲由社仔侵入水裏社再墾四百餘甲復侵入沈鹿築上圍墾五百餘甲三社番弱莫敢較已乃僞爲貴官率民壯佃丁千餘人至埔裏社囊土爲城黃旗

大書開墾社番不服相持月餘乃謀使番割詐稱罷墾官
兵卽日撤回使壯番進山取鹿茸爲獻乘其無備大肆焚
殺生番男婦逃入內窟聚族而嚎者半月得番串鼻熟牛
數百未串鼻野牛數千粟數百石器物無數聞社中風俗
番死以物殉葬乃發掘番塚百餘每塚得鎗刀各一旣奪
其地築土圍十三木城一益召佃墾眾番無歸走依窟社
赤崁而居先是漢番相持鎮道微有所聞使人偵之皆還
報曰野番自與社番鬥耳社番不諳耕作口食無資漢佃
代墾以充糧食又人寡弱倚漢爲援故助之所殺者野番
也二十一年冬武鎮軍隆阿巡閱臺北悉其事嚴詰之於
是彰化縣令吳性誠請諭墾戶驅逐眾佃出山而奸民持
臺府示不遵有希府中指者言漢佃萬餘所費工資甚鉅

東槎紀略

卷之一

三六

已成田園一旦逐之恐滋變性誠上言曰埔地逼近內山
道路叢雜深林密箐一經准墾人集日多竊恐命盜兇犯
從而溷迹儻招集亡命肆行無忌奈何且此埔素爲生番
打鹿之場卽開墾後明定界址而奸貪無厭久必漸次私
越雖番性愚蠢而兇悍異常一旦棲身無所勢必挺而走
險火啟邊衅不若乘未深入全驅出山尙可消患未萌鎮
道深納其言飭臺府撤還二十二年六月傳諸人至郡會
訊予郭百年以枷杖其餘宥之署鹿港同知張儀盛彰化
縣知縣吳性誠呂志恆赴沈鹿折毀土城水埔二社耕佃
盡撤生番始各歸社集集烏溪二口各立禁碑然二十四
社自是大衰漢人稍稍復入社仔社番被逐并入頭社貓
蘭并入水裏社而哆咯唧福骨兩社與沙里興爲鄰混入

兇番眉裏致霧安里萬三社亦暗通兇番以自固埔裏人少雖與水裏和睦而不能救援甚自危道光三年遂有萬斗六社革通事田成發詭與埔社番謀招外社熟番爲衛給以荒埔墾種埔社聽之田成發乃結北投社革屯弁乃貓詩革通事余貓尉招附近熟番潛往復墾而漢人陰持其後俟熟番墾成溷入爲侵佔之計先是成發之黨嘗與水沙連社丁首蕭長發有隙長發乃首破其謀道光三年九月鹿港同知鄧傳安會營入埔裏社察之越墾熟番聞聲先遁撫諭社眾而還然傳安頗有開設之議又有流寓紹興人馬莪士者至福州誘商人林志通謀爲業戶趙文恪公以問前臺灣縣姚瑩瑩曰臺灣生齒日繁遊手甚眾山前無曠土矣番弱勢不能有其地不及百年山後將全

東槎紀略

卷之一

三七

入版圖不獨水埔二社也然會有其時今則尙未可耳四年五月孫公至臺欲議其事傳安力言其地膏腴山川秀美孫公意動欲如噶瑪蘭故事以問臺灣知府方傳穰時姚瑩在臺傳穰訪焉瑩曰必欲開二社者有要略八事君其言之傳穰問其略云何瑩曰往者噶瑪蘭之開也乾隆開卽有民人潛往嘉慶元年吳沙率眾佃入山佔奪攻殺凡十餘年楊廷理往開時大局已定故眾社番獻納輿圖設官經理然委員督墾之初東勢社番亦尙相持強而後可今埔社開墾之民已驅逐出山社番并未輸誠愿納前此漢人焚殺夙怨未忘今往開墾必先和睦番情其一也番漢言語不通和番需用通事而通事多卽姦人彼不以國家安撫爲辭而以危辭恫喝社番畏而從命心實不甘

設有異謀殊傷

國體况開設之初番漢交涉事多小故門毆皆足釀亂通事必求良善其要二也水社在外如社仔審鹿諸地已爲漢人佔墾者無論矣埔社周圍數十餘里其中社番自墾成田者不過十之一二餘皆荒埔今外社熟番往墾者不過二百餘人官墾則招佃約用巨萬將以何者爲番田何者爲官佃官課番租不可淆混其要三也社東北沿山各社卽非埔裏之地其內徑諸處是否并開或以山爲界其山外通噶瑪蘭及奇來秀姑蘭諸處開設後不無民人私越往來其中界址作何開閉其要四也前此漢民往墾各有頭人承領懇照其意在充業戶此時必仍萌故智業戶之設其弊無窮初不過十餘人出名領照名爲自出工資

東槎紀略

卷之一

三

募佃實卽鳩合朋充私相契約及墾成報官勘丈戈甲若干四至何所業戶一人界廣易於隱匿賦定之後遇水旱偏災可任意影射且征收租課戶止一名欠嘗千萬一有破敗更換爲難不若官荒召佃永除業戶之名此前守楊廷理所以力破業戶之議也然姦人鳩贊謀充其利甚大不惜賄賂以求必得則倡爲邪說以惑上聽惟姦計不行然後民佃乃可相安其要五也地方數十里墾田數千甲用佃多者殆將萬人紛紛烏合苟無頭人經理不但無從約束且工本何出昔蘭人之法合數十佃爲一結通力合作以曉事而費多者爲之首名曰小結首合數十小結中舉一富強有力公正服眾者爲之首名曰大結首有事官以問之大結首大結首以問之小結首然後有條不紊視

其人多寡授以地墾成畝佃公分人得地若干甲而結首
倍之或數倍之視其資力今開埔社亦當略仿此意行之
庶乎其可其要六也噶瑪蘭地南北蓋百餘里并山計之
幾千二百東西腹內亦四五十里不足置縣故設一廳今
埔社方三十餘里耳并水社山埔計之或百餘里似不足
爲一廳縣然其地在萬山中南自集集舖北自烏溪兩路
入山皆極迂險內逼兇番後通噶瑪蘭奇來諸處蓋全臺
之要領前後山海之關鍵形勢天成去彰化縣城遼遠非
佐雜微員所能鎮撫不得不略如廳縣之制文武職官廉
俸兵餉作何籌給不可不爲計及其要七也田園日闢生
聚日多不特商賈貨販通行卽所產米穀民食必須出山
糶糴其南路由隘口進水社山嶺重峻勢不可行惟北路
東槎紀略

卷之一

三

烏溪水道可通而溪水上流頗淺亂石嶮岬亦當開通以
便舟楫其要八也以上八事乃開設之大綱其餘細務猶
在所後經理之人非才識足以幹事操守足以信眾不可
傳穉陳其說孫公見而難之時吳性誠爲淡水同知呂志
恆爲噶瑪蘭通判令傳穉更集眾議性誠志恆皆以爲禁
之便傳安不能執前說也亦以爲當禁傳穉乃採眾議詳
請禁之如故

論曰臺灣本海外島夷不賓中國自鄭氏驅除狴獠始闢
入籍時止三縣半線以北康熙之末猶番土也朱逆旣平
乃增彰化設淡廳遂極其北境至于鷄籠山前之地盡矣
然南北袤不過一千二百餘里嘉彰最中腹內自山至海
寬乃百餘里耳入內供粟歲不過十萬而兵餉給外者倍

之其不能利益

國家明矣嘉慶中又開噶瑪蘭遂及山後增幅員百里論者皆以形勝爲言夫

聖德遐被八荒皆我外藩鴻圖式廓遠邁隆古乃侈言滄海之一舟大園之一星豈非陋耶若夫雕題裸體之民言語不通蹲伏深山墾耕自給沒世不敢出山一步然猶慕化充屯則是我

天朝之赤子較諸漢奸不法者奚翅十倍此土牛立界所以嚴申厲禁誠仁之至也有司守此邊陲不以宣播德威爲務乃任彼私人交通豪猾違禁開邊且肆其兇殘暴其枯骨所當駢首境上以昭炯戒而慰番黎乃復隱忍逾年越墜之詰發自鎮臣斯時猶有阿意庇奸爲依違之說者東槎紀略

卷之一

四

向非邑令抗爭鎮道明決則奸人之計仍行矣卒之投鼠忌器曲赦有罪使

國禁不申番寃莫理政刑之失孰有甚于此者哉火災不烈厲禁益虛于是奸人故智復萌不及數年而水社之穀復歸漢佃番愚不知訟訴社眾曰哀外迫兇番內懼漢逼不得已從奸人之謀欲引外番自衛漢奸更從而躡其後養虎揖盜其事益愚其情益可憫矣鄧君深入內山窮履生番之境可謂壯甚而水社之山川秀美埔社之地土沃饒言次猶津津稱之且以番黎拙于治田不能深耕灌溉爲惜自余觀之喜功利者貪壤地之膏腴懼開邊者守土牛之虛禁此皆見止一隅未深計久安之策也水埔二十四社自雍正乾隆閒卽稱沃衍惟時番族猶盛足以自固

漢人不知虛實無敢深入且臺灣開闢未久地利有餘今
山前無隙土矣舊族日滋新來不已無業可執則有三種
莠民一輿夫千百爲羣動與兵鬥二赤棍結黨立會散處
市廛三盜賊竊劫頻聞誅之不盡此全臺之大患也不爲
區處臺灣未可言安則曠土之開云胡得已漢人蕃衍丁
口已二百五十餘萬而生熟社番不及二十分之一匪惟
貧削實亦丁衰寡弱之形殆若有天數焉其不能自固者
不僅水埔二社也勢旣寡弱則奸民欺凌益甚况頻年深
入虛實周知卽外社熟番亦垂涎至矣雖有明禁而趨利
忘生旋驅復入昔者殺番掘塚其首惡旣釋不誅今茲負
耒而來安能遂置重典一再寬宥禁碑尙可恃乎旣不能
禁不但社番被逼有走險之虞抑且地形險阻設有巨奸
東槎紀略

卷之一

一

招聚亡命卽林爽文之大里杙也其患可勝言哉則安撫
之道又不可不講矣